



Rehema kwa Waliopagawa

na Pepo

Naye alipofika ng'ambo, katika nchi ya Wagerasi, watu wawili wenye pepo walikutana naye, wanatoka makaburini, wakali mno. —**Mathayo 8:28.**

Asubuhi na mapema Mwokozi na wenzake walifika ufukweni.... Lakini mara tu walipofika pwani, macho yao yakakutana na tukio la kutisha zaidi kuliko ghasia za dhoruba. Kutoka mahali pao pa kujificha kati ya makaburi, watu wawili waliopagawa na pepo waliwakimbilia kana kwamba wanataka kuwachana vipande vipande....

Wanafunzi na wenzao walikimbia kwa hofu; lakini mara wakagundua kuwa Yesu hakuwa pamoja nao.... Alikuwa amesimama pale walipomwacha. Yeye ambaye alikuwa ametuliza dhoruba ... hakuogopa na kuwakimbia mapepo hawa....

Kwa mamlaka, aliwaamuru pepo wachafu wawatoke. Maneno yake yalipenya kwenye akili zilizogubikwa na giza za watu wale waliokuwa katika hali ya kusikitisha.... Mabadiliko ya ajabu yalikuwa yamewapata wale watu waliopagawa. Nuru ilianguka ndani ya akili zao. Macho yao yalionesha akili. Nyuso zao, ambazo kwa muda mrefu zilikuwa zimepotcshwa kufanana na Shetani, ghasia zikawa za upole, mikono iliyokuwa imejaa damu ikatulika, na kwa sauti za furaha watu wale walimsifu Mungu kwa ukombozi wao....

Watu wa Gergesa walikuwa na ushahidi wa moja kwa moja wa nguvu na rehema za Kristo mbele yao. Waliona wale watu ambao walikuwa wamerejeshewa akili zao; lakini walikuwa na hofu sana ya kuhatarisha maslahi yao ya kidunia kiasi kwamba Yeye aliyekuwa amemshinda mkuu wa giza mbele ya macho yao alitendewa kama mgeni, na Zawadi ya mbinguni ikafukuzwa mlangoni mwao....

Lakini hisia za wale walioponywa pepo zilikuwa tofauti kabisa. Walitamani kuambatana na Mkombozi wao. Katika kuwepo Kwake walihisi usalama kutoka kwa mapepo yaliyokuwa yakisumbua maisha yao na kuharibu utu wao. Yesu alipokuwa karibu kuingia kwenye mashua, walibaki karibu na Yeye, wakapiga magoti-miguuni Mwake, na kumsihi awakubali waendeleo kukaa karibu Naye, ili wapate kusikiliza maneno Yake daima.

Lakini Yesu aliwaambia waende nyumbani na kuhubiri mambo makuu ambayo Bwana alikuwa amewatendea....

Mara tu Yesu alipowaonesha jukumu lao, walikuwa tayari kutii. Sio tu waliwaambia familia zao na majirani zao kuhusu Yesu, lakini walizunguka kote Dekapoli, kila mahali wakitangaza nguvu Yake inayookoa.... Kwa kufanya kazi hii waliweza kupokea baraka kubwa zaidi kuliko kama wangebaki tu kwa manufaa yao wenyewe katika uwepo Wake. Ni kwa kufanya kazi ya kueneza habari njema za wokovu ndipo tunapokaribiana na Mwokozi.... Hawakuweza kuwafundisha watu kama wanafunzi ambao walikuwa wakikaa na Kristo kila siku walivyoweza kufanya. Lakini walikuwa na ushahidi ndani ya nafsi zao wenyewe kwamba Yesu alikuwa Masihi. Wangeweza kusema kile walichojua; kile walichoonza, walichosikia, na walichohisi kuhusu nguvu ya Kristo (The Desire of Ages, 337-340).